

摘藻堂四庫全書薈要

經部

欽定四庫全書薈要卷二千七百十

經部

大學衍義補卷一百

明 邱濬 撰

治國平天下之要

慎刑憲

總論制刑之義上

易噬

齧也

嗑

合也

亨

利用

獄

程頤曰口中有物則隔其上下不得嗑必齧之則得

噬故為噬噬聖人以卦之象推之於天下之事在口則為有物隔而不得合在天下則為有彊梗或讒邪間隔於其間故天下之事不得合也當用刑法小則懲戒大則誅戮以除去之然後天下之治得成矣噬噬者治天下之大用也去天下之間在任刑罰

又曰天下之事所以不得亨者以有間也噬而噬之則亨通矣利用獄噬而噬之道宜用刑獄也天下之間非刑獄何以去之不云利用刑而云利用獄者

卦有明照之象利於察獄也獄者所以究治情偽得其情則知為間之道然後可以設防與致刑也

朱熹曰卦以陰居陽雖不當位而利用獄蓋治獄之道惟威與明而得其中之為貴

彖曰頤中有物曰噬嗑噬嗑而亨剛柔分動而明雷電合而章柔得中而上行雖不當位利用獄也

程頤曰剛爻與柔爻相間剛柔分而不相雜為明辨之象明辨察獄之本也動而明下震上離其動而明

也雷電合而章雷震而電耀相須並見合而章也照與威並行用獄之道也能照則無所隱情有威則莫敢不畏六五以柔居五為不當而利於用獄者治獄之道全剛則傷於嚴暴過柔則失於寬縱五為用獄之主以柔處剛而得中得用獄之宜也

臣按先儒有言噬嗑震上離下震雷離電天地生物有為造物之梗者必用雷電擊搏之聖人治天下有為生民之梗者必用刑獄斷制之故噬嗑以

去頤中之梗雷電以去頤中之梗刑獄以去天下之梗也所謂梗者即有間之謂也物有間於吾頤之中必齧斷之而後口可閉合口不能合則有所窒礙而氣有不通矣人有梗於吾治之間必斷制之而後民得安靖民不得安則有所苛擾而生有不寧矣然其所以梗吾治而使民之不安者必有其情焉有其情故有其獄也所以治斯獄也非明不能致其察非威不能致其決明以辨之必如電

之光歛然而照耀使人不知所以為蔽威以決之
必如雷之震轟然而擊搏使人不知所以為拒明
與威竝行用獄之道也然其施於外者用其剛如
此可爾若夫存於中者則又以柔為本而其柔也
非專用柔用柔以處剛無太過焉無不及焉夫是
之謂中夫是之謂利苟偏於一而或過與不及則
非中矣則為不利矣

象曰雷電噬嗑先王以明罰勅法

程頤曰電明而雷威先王觀雷電之象法其明與威以明其刑罰勅其法令法者明事理而為之防者也吳澂曰明者辨別精審之意勅者整飭嚴警之意明象電光勅象雷威罰者一時所用之法法者平日所定之罰一時所用之允當者示平日所定之信必也故明其罰所以勅其法

臣按制定於平昔者謂之法施用於臨時者謂之罰法者罰之體罰者法之用其實一而已矣人君

象電之光以明罰象雷之威以勅法盖電之光非如日星之明有恒而不息歛然而為光於時頃之間如人之有罪者或犯於有司則當隨其事而用其明察以定其罰焉或輕或重必當其情不可掩蔽也否則非明矣雷之威歲歲有常虩虩之聲震驚百里如國家有律令之制違其式而犯其禁必有常刑或輕或重皆有定制不可變渝也否則非勅矣夫法有定制而人之犯也不常則隨其所犯

而施之以責罰必明必允使吾所罰者與其一定
之法無或出入無相背戾常整飭而嚴謹焉用獄
如此無不利者矣

初九屨

加於足

校

木械

滅趾

傷滅其趾

无咎

小懲而大戒故无咎

六二噬膚

无骨

滅深入至沒其鼻

鼻

无咎

六三噬腊肉

乾腊堅韌之物

遇毒

小吝

无咎

九四噬乾肺

肉之帶骨者

得金

金鈞

矢

束矢

利艱貞吉

六五

噬乾肉得黃金貞厲无咎上九何校滅耳凶

朱熹曰初上无位為受刑之象中四爻為用刑之象

初在卦始罪薄過小又在卦下故為屢校滅趾之象
止惡於初故得无咎

子曰小人不恥不仁不畏不義不見利不勸不威不懲
小懲而大誡此小人之福也易曰屢校滅趾无咎此之
謂也善不積不足以成名惡不積不足以滅身小人以
小善為無益而弗為也以小惡為無傷而弗去也故惡
積而不可掩罪大而不可解易曰何上聲校滅耳凶

臣按噬嗑一卦六爻俱以刑獄言而聖人於大傳

特論初九上九二爻蓋初與上无位為受刑之人
而其中四爻則用刑之人也然下之人必犯於刑
而後受之所以受之者由上之人用之也用刑以
刑人將使人不敢為惡而務於為善然後吾刑不
用矣上无所用則下无所受下无何校滅耳之苦
上无滅鼻遇毒之勞所以然者聖人明罰勅法懲
之於早故也天生聖人為民造福既叙彝倫而錫
君子以考終命之福復明刑罰而養小人以全身

命之福蓋小人不以不仁為恥見利而後勸於為
仁不以不義為畏畏威而後懲於不義懲之於小
所以誠其大懲之於初所以誠其終使其知善不
在大而皆有所益惡雖甚小而必有所傷不以善
小而弗為不以惡小而為之不至於惡積而不可
掩罪大而不可解以傷其膚殞其身亡其宗其為
小人之福也則亦何以異於錫君子者哉

賁之象曰山下有火賁君子以明庶政无敢折獄

程頤曰君子觀山下有火明照之象以修明其庶政
成文明之治而无果敢於折獄也折獄者人君之所
致慎也豈可恃其明而輕自用乎乃聖人之用心也
為戒深矣折獄者專用情實有文飾則沒其情矣故
无敢用文以折獄也

朱熹曰山下有火明不及遠明庶政事之小者折獄
事之大者內離明而外艮止故取象如此

旅之象曰山上有火旅君子以明慎用刑而不留獄

程頤曰火之在高明无不照君子觀明照之象則以明慎用刑明不可恃故戒於慎明而止亦慎象觀火行不處之象則不留獄獄者不得已而設民有罪而入豈可留滯淹久也

臣按朱熹謂賁與旅卦皆說刑獄事但爭艮與離之在內外故其說相反止在外明在內故明庶政而不敢折獄止在內明在外故明慎用刑而不留獄粗言之如今州縣治獄禁勘審覆自有許多節

次過乎此而不決便是留獄不及乎此而決便是
敢於折獄書曰要囚服念五六日至于旬時丕蔽
要囚周禮秋官亦有此句便是有合如此者若獄
未具而決之是所謂敢折獄也若獄已具而留之
不決是所謂留獄也由是觀之賁旅二卦蓋交相
成而互相用也獄之未具則不敢折故獄得真情
而人不冤獄之已具則無或留故獄不停囚而人
不滯治獄之道脩於此矣治獄君子必象離之明

以爲之體象山之止以爲之用明矣而猶不敢折獄明矣而猶必慎而不留皆止之象也獄不難於治而難於用故噬嗑卦辭曰利用獄

豐之象曰雷電皆至豐君子以折獄致刑

程頤曰雷電皆至明震並行也二體相合故云皆至離明也照察之象震動也威斷之象折獄者必照其情實惟明克允致刑者必威於姦惡惟斷乃成故君子觀雷電明動之象以折獄致刑也

朱熹曰噬嗑明在上是明得事理先立這法在此未
有犯的人留待異時之用故云明罰勅法豐威在上
明在下是用這法時湏是明見下情曲折方得不然
威動於上必有過錯也故云折獄致刑此是程子之
意其說極好

洪邁曰易六十四卦而以刑罰之事著於大象者凡
四焉噬嗑旅上卦為離豐賁下卦為離離明也聖人
知刑獄為人司命故設卦觀象必以文明為主而後

世付之文法俗吏何耶

臣按豐之為卦盛大之義也明足以照動足以亨
然後能致豐大之功苟天下之人有以梗吾之教
化犯吾之禁令而吾之明不足以照之吾之威不
足以折之何以成其豐亨盛大之治哉是以君子
必體電之明以折斷獄情體雷之威以致用刑殺
威至而明不至不可也明至而威不至不可也必
明威並用如雷之擊也必與電俱電之掣也必與

雷並明寓於威斷之中則其威也非肆暴虐而灼然有以燭其姦威施於明察之下則其明也非作聰明而毅然有以正其罪威明並用容光之下無不照雷霆之下無不折無一人而敢隱其情無一地而敢負其固則天下之大四海之廣豐豫而亨通矣

中孚之象曰澤上有風中孚君子以議獄緩死

程頤曰水體虛故風能入之人心虛故物能感之風

之動乎澤猶物之感於中故為中孚之象君子觀其象以議獄與緩死君子之於議獄盡其忠而已於決死極於惻而已故誠意常求於緩緩寬也於天下之事無所不盡其忠而議獄緩死其最大者也

朱熹曰風感水受中孚之象議獄緩死中孚之意

楊萬里曰風無形而能震川澤鼓幽潛誠無象而能動天地感人物此澤上有風所以為中孚故君子以之議獄緩死蓋好生治民舜之中孚也不犯有司天

下之中孚也天下中孚則萬心一心矣鳥巢可窺況
豚魚乎無他不殺之心孚於鳥耳使無誠慤好生之
心巢中之鳥不為海上之鷗乎議獄者求其入中之
出緩死者求其死中之生若元惡大姦不在是典故
四凶無議法少正卯無緩理

臣按卦象言刑獄者五卦噬嗑賁豐旅中孚也噬
嗑賁豐旅皆有離象而噬嗑豐則兼取震賁旅則
兼取艮蓋獄以明照為主必先得其情實則刑不

濫然非震以動之則無有威斷非艮以止之則輕
於用刑惟中孚一卦則有取於巽兌先儒謂中孚
體全似離互體有震艮盖用獄必明以照之使人
無隱情震以威之使人無拒意而又當行而行當
止而止不過於用其明而恣其威也夫然後兌以
議之巽以緩之原情定罪至再至三詳之以十議
原之以三宥王聽之司寇聽之三公聽之旬而職
聽三旬而職聽三月而上之議而又議緩而又緩

求其出而不可得然後入之求其生而不可得然後死之本乎至誠孚信之心存乎至仁惻怛之意在我者有誠心則在人者無遺憾矣聖人作經垂世立教惓惓於刑獄之事不一而足焉如此其知天下後世之憂患而為之慮也深且遠矣

書舜典象以典刑流宥五刑鞭作官刑扑作教刑金作贖刑青災肆赦怙終賊刑欽哉欽哉惟刑之恤哉

朱熹曰象如天之垂象以示人而典者常也示人以

常刑所謂墨劓剕宮大辟五刑之正也所以待夫元惡大憝殺人傷人穿窬淫放凡罪之不可宥者也流宥五刑者流遣之使遠去如下文流放竄殛之類是也宥寬也所以待夫罪之稍輕雖入於五刑而情可矜法可疑與夫親貴勲勞而不可加以刑者則以此而寬之也鞭作官刑者木末垂革官府之刑也扑作教刑者夏楚二物學校之刑也皆以待夫罪之輕者金作贖刑者金黃金贖贖其罪也蓋罪之極輕雖入

於鞭扑之刑而情法猶有可議者也此五句者出重
入輕各有條理法之正也肆縱也青災肆赦者青謂
過誤災謂不幸若人有如此而入於刑則又不待流
宥金贖而直赦之也賊殺也怙終賊刑者怙謂有恃
終謂再犯若人有如此而入於刑則雖當宥當贖亦
不許其宥不聽其贖而必刑之也此二句者或由重
而即輕或由輕而即重盖用法之權衡所謂法外意
也聖人立法制刑之本末此七言者大略盡之矣雖

其輕重取舍陽舒陰慘之不同然欽哉欽哉惟刑之恤之意則未始不行乎其間也蓋其輕重毫釐之間各有攸當者乃天討不易之定理而欽恤之意行乎其間則可以見聖人好生之本心也

又曰象以典刑此一句乃五句之綱領諸刑之總括猶今之刑皆結於笞杖徒流絞斬也凡人所犯合墨則加以墨刑所犯合劓則加以劓刑非宮大辟皆然流宥五刑者其所犯合此五刑而情輕可恕或因

過誤則全其肢體不加刀鋸但流以宥之屏之遠方
不與同齒如五流有宅五宅三居之類鞭作官刑者
此官府之刑猶今之鞭撻吏人蓋有一項刑專以治
官府之胥吏如周禮治胥吏鞭五百鞭三百之類扑
作教刑此一項學官之刑猶今之學舍夏楚凡教人
之事有不率者則用此刑扑之如侯明撻記之類金
作贖刑謂鞭扑二刑之可恕者則許用金以贖其罪
夫象以典刑之輕者有流以宥之鞭扑之刑之輕者

有金以贖之流宥所以寬五刑贖刑所以寬鞭扑聖人斟酌損益低昂輕重莫不合天理人心之自然而無毫釐秒忽之差也其曰欽哉欽哉惟刑之恤哉者此則聖人畏刑之心閔夫死者之不可復生刑者之不可復續惟恐察之有不審施之有不當又雖已得其情而猶必矜其不教無知而抵冒至此也詳此數言則聖人制刑之意可見而其於輕重淺深出入取舍之際亦已審矣雖其重者或至於誅斬斷割而不

少貸然本其所以至此則其所以施於人者亦必嘗有如是之酷矣是以聖人不忍其被酷者銜冤負痛而為是以報之雖若甚慘而語其實則為適得其宜雖以不忍之心畏刑之甚而不得赦也惟其情之輕者聖人於此乃得以施其不忍畏刑之意而有以宥之然亦必投之遠方以禦魑魅蓋以此等所犯非殺傷人則亦或淫或盜其情雖輕而罪實重若使既免於刑而又得還鄉復為平民則彼之被其害者寡妻

孤子將何面目以見之而此幸免之人髮膚肢體了無所傷又將得以遂其前日之惡而不悔此所以必曰流以宥之而又有五流有宅五宅三居之文也若夫鞭扑之刑則雖刑之至小而情之輕者亦必許其入金以贖而不忍輒以真刑加之是亦仁矣然而流專以宥肉刑而不下及於鞭扑贖專以待鞭扑而不上及於肉刑則其輕重之間又未嘗不致詳也至於過誤必赦故犯必誅之法則又權衡乎五者之內欽

哉欽哉惟刑之恤之旨則常通貫乎七者之中此聖人制刑明辟之意所以雖或至於殺人而其反覆表裏至精至密之妙一一皆從廣大虛明心中流出而非私智之所為也而或者之論乃謂上古惟有肉刑舜之為流為贖為鞭為扑乃不忍民之斬戮而始為輕刑者則是自堯以上雖犯鞭扑之刑者亦必始從墨劓之坐而舜之心乃不忍於殺傷淫盜之凶賊而反忍於見殺見傷為所侵犯之良民也聖人之心其

不如是之殘忍偏倚而失其正亦已明矣

臣按舜典此章萬世論刑之祖象以典刑以下七句凡二十八字萬世聖人制刑之常典欽哉欽哉惟刑之恤哉二句凡九字萬世聖人恤刑之常心聖賢之經典其論刑者千言萬語不出乎此帝王之治法其制刑者千條萬貫亦不外乎此後世帝王所當準則而體法焉者也此章真氏衍義既已載於審治體篇以見德刑輕重之分而此又備詳

之者蓋前編言其理所以致其知故宜略此編載
其事所以見於行故不得不詳蓋互相備也他倣
此

帝曰臯陶蠻夷猾

亂也

夏寇

劫人曰寇

賊

殺人曰賊

姦

在外曰姦

宄

在內曰宄

汝作士

理官也

五刑有服

服服其罪

五服三就

五等象刑之當宥者

五流

五等象刑之當宥者

有宅五宅三居惟明克允

朱熹曰服服其罪也呂刑所謂上服下服是也三就
孔氏以為大罪於原野大夫於朝士於市竊恐惟大

辟棄之於市宮辟則下蠶室餘刑亦就屏處蓋非死刑不欲使風中其瘡誤而至死聖人之仁也五流五等象刑之當宥者也五宅三居者流雖有五而宅之但為三等之居孔氏以為大罪居於四裔次則九州之外次則千里之外大概當略近之此因禹之讓而申命之又戒以必當致其明察乃能使刑當罪而人無不信服也

臣按惟明則情偽畢知克允則輕重適當非明不

足以盡人情不允不足以當人罪帝舜告皋陶而
戒之以惟明克允謂之惟者此外別無他術謂之
克者如此然後能信

大禹謨帝曰皋陶惟茲臣庶罔或干犯也予正政也汝作士

明于五刑以弼輔也五教期于予治刑期于無刑民協于

中時乃功懋哉

朱熹曰聖人之治以德為化民之本而刑特以輔其
所不及而已期者先事取必之謂舜言惟此臣庶無

或有干犯我之政者以爾為士師之官能明五刑以輔五品之教而期我以至於治其始雖不免於用刑而實所以期至於無刑之地故民亦皆能協於中道初無有過不及之差則刑果無所施矣凡此皆汝之功也

朱熹又曰法家者流往往常患其過於慘刻今之士大夫恥為法官更相循襲以寬大為事於法之當死者反求以生之殊不知明于五刑以弼五教雖舜亦

不免教之不從刑以督之懲一人而天下知所勸戒
所謂辟以止辟雖曰殺之而仁愛之實已行乎中今
非法以求其生則人無所懲懼陷於法者愈衆雖曰
仁之適以害之聖人亦不曾徒用政刑到德禮既行
天下既治亦不曾不用政刑故書說刑期于無刑只
是存心期于無而刑初非可廢

臣按明于五刑以弼五教此萬古聖人制刑之本
意也可見刑之制非專用之以治人罪蓋恐世之

人不能循夫五倫之教故制刑以輔弼之使其為
子皆孝為臣皆忠為兄弟皆友居上者則必慈與
人者則必信夫必守義婦必守禮有一不然則入
於法而刑辟之所必加也天下之人有見於此其
資質之美者有所畏而一於為善氣稟之偏者有
所懲而不敢為惡則彛倫為之益叙而刑罰可以
不用矣

臯陶曰宥過無大刑故無小罪疑惟輕功疑惟重與其

殺不辜寧失不經好生之德洽于民心茲用不犯于有司

朱熹曰過者不識而誤犯也故者知之而故犯也過誤所犯雖大必宥不忌故犯雖小必刑即上篇所謂青災肆赦怙終賊刑者也罪已定矣而於法之中有疑其可重可輕者則從輕以罰之功已定矣而於法之中有疑其可輕可重者則從重以賞之辜罪經常也謂法可以殺可以無殺殺之則恐陷於非辜不殺

之恐失於輕縱二者皆非聖人至公至平之意而殺
不辜者尤聖人之所不忍也故與其殺之而害彼之
生寧姑全之而自受失刑之責此其仁愛忠厚之至
皆所謂好生之德也蓋聖人之法有盡而心則無窮
故其用刑行賞或有所疑則常屈法以伸恩而不使
執法之意有以勝其好生之德此其本心所以無所
壅遏而得行於常法之外及其流行洋溢漸涵浸漬
有以入於民心則天下之人無不愛慕感悅興起於

善而自不犯于有司也

朱熹曰觀臯陶所言帝德罔愆以下一節便是聖人之心涵育發生真與天地同德而物或自逆於理以干天誅則夫輕重取舍之間亦自有決然不易之理其宥過非私恩其刑故非私怒罪疑而輕非姑息功疑而重非過予如天地四時之運寒涼肅殺常居其半而涵養發生之心未始不流行乎其間此所以好生之德洽于民心而自不犯于有司非既抵罪而後

縱舍之也夫既不能止民之惡而又為輕刑以誘之
使得以肆其凶暴於人而無所忌則不惟彼見暴者
無以自伸其冤而姦民之犯于有司者且將日以益
衆亦非聖人匡直輔翼使民遷善遠罪之意也

臣按好生之德洽于民心此帝舜所以為舜也蓋
天地生人而人得以為生是人之生也莫不皆欲
其生然彼知己之欲生而不知人之亦莫不欲其
生也是以相爭相奪以至於相殺以失其生生之

理人君為生人之主體天地之大德為生靈之父
母於凡天下之人無不欲其生於凡有生者苟可
以為其養生之具者無不為之處置營謀俾之相
安相樂以全其生生之天苟於其中有自戕其生
而逆其生生之理者則必為之除去此所以有刑
法之制焉所以然者無非欲全民之生而已聖人
欲全民之生如此一言以蔽之曰好生吁天地之
大德曰生聖人之大德曰仁仁者好生之謂也

康誥王曰嗚呼封敬明乃罰人有小罪非眚乃惟終自作不典式也用爾有厥罪小乃不可不殺乃有大罪非終乃惟眚災適爾既道極厥辜時乃不可殺

蔡沈曰此慎罰也人有小罪非過誤乃其固為亂常之事用意如此其罪雖小乃不可不殺即舜典所謂刑故無小也人有大罪非是故犯乃其過誤出於不幸偶爾如此既自稱道盡輸其情不敢隱匿罪雖大時乃不可殺即舜典所謂宥過無大也諸葛孔明治

蜀服罪輸情者雖重必釋其既道極厥辜時乃不可殺之意歟

臣按康誥所謂既道極厥辜時乃不可殺一言此後世律文自首者免罪之條所自出也

非汝封

康叔名

刑人殺人無或刑人殺人非汝封

三字當在又曰

下

又曰劓

割劓也

剕

截耳也

人無或劓剕人

蔡沈曰刑殺者天之所以討有罪非汝封得以刑之殺之也汝或無以已而刑殺之刑殺刑之大者劓剕

刑之小者兼舉小大以申戒之也

朱熹曰康叔為周司寇故一篇多說用刑呂氏說非汝封刑人殺人則人亦無敢刑人殺人又曰非汝封剿則人則人亦無敢剿則人蓋言用刑之權正在康叔不可不謹之意耳

臣按康誥此言可見刑無大小皆上天所以討有罪者也為人上者苟以私意刑戮人則非天討矣一人殺人有有限而下之人效之其殺戮滋多為人

上者奈何不謹於刑戮上拂天意下失人心皆自此始衰世之君往往任意恣殺享年所以不永國祚所以不長其以此夫

王曰汝陳時臬

法也為準限之意

事罰蔽殷彝用其義

宜刑義

殺勿庸以次

次舍次

汝封乃汝盡遜

順也

曰時叙惟曰未有

遜事

蔡沈曰言敷陳是法與事罰斷以殷之常法矣又慮其泥古而不通又謂其刑其殺必察其宜於時者而

後用之既又慮其趨時而徇已又謂刑殺不可以就
汝封之意既又慮其刑殺雖已當罪而矜喜之心乘
之又謂使汝刑殺盡順於義雖曰是有次叙汝當惟
謂未有順義之事蓋矜喜之心生乃怠惰之心起刑
罰之所由不中也可不戒哉

臣按此武王封康叔於衛告以謹罰之意蓋衛是
殷之故都周承殷之後康叔往殷故都而治其遺
民故欲其敷陳是刑法之事其有所罰者一斷以

前殷之常法矣然殷之刑殺不必皆是也有合義者焉有不合義者焉惟取其合於義者而用之然所謂合義與否又不可專用以就已意也夫既合於義又不徇己則刑罰當其罪矣設使刑殺盡順於義雖曰是有次叙而汝亦惟曰未有順義之事焉蓋刑殺關乎人之性命一人負冤天地為之變色和氣為之感傷人心為之喪失烏可以輕忽哉武王告康叔以雖盡遜而惟曰未遜事蓋欲康叔

之心常常不足已邇而猶曰未邇已盡而常如未
盡則不敢輕視人命而苟具獄辭則問刑之人與
受刑之人兩無所憾焉刑罰無不中者矣人君命
臣以治民而欲其慎罰拳拳告教如此為之臣者
安敢不盡其心哉

立政曰和我庶獄庶慎時則勿有間之又曰繼自今文
子文孫其勿誤于庶獄庶慎惟正是又之又曰今文子
文孫孺子王矣其勿誤于庶獄惟有司之牧夫

蔡沈曰庶獄獄訟也庶慎國之禁戒儲備也和調均
齊獄慎之事而又戒其勿以小人間之使得終始其
治此任人之要也文子文孫者成王武王之文子文
王之文孫也誤失也有所兼有所知不付之有司而
以已誤之也正猶康誥所謂正人與官正酒正之正
指當職者為言不以已誤庶獄庶慎惟當職之人是
治之又曰始言和我庶獄庶慎時則勿有間之繼言
其勿誤于庶獄庶慎惟正是又之至是獨曰其勿誤

于庶獄惟有司之牧夫蓋刑者天下之重事挈其重而獨舉之使成王尤知刑獄之可畏必專有司牧夫之任而不可以已誤之也

呂祖謙曰始言庶言庶獄庶慎繼去其一止曰庶獄庶慎又去其一獨曰庶獄蓋挈其尤重獨舉之獄曷為其獨重也民命所繫亦國命所繫也導迎善氣祈天永命者獄也並告無辜無世在下者亦獄也宜周公獨言而獨戒之

臣按先儒謂立政周公說不可誤于庶獄庶慎到此又說獄者蓋獄者天下之命所以文王必明德慎罰收聚人心感名和氣皆是獄離散人心感名乖氣亦是獄大底事最重處只在于獄故三代之得天下只在不嗜殺人秦之所以亡亦只是獄不謹惟是以用獄之際養得一好生之德自此發將去方能盡得君德所謂事最重處只在于獄最為切要人君為治真誠知獄之為重則必調和均齊

夫獄慎之事擇人以用而不間以小人委心以用而不誤以已私惟在內之獄專任之以司刑之職在外之獄分命之以牧守之任用命者則申敕之使益虔違命者則戒約之使不肆非惟不敢誤且不敢兼之也

以上總論制刑之義

上

大學衍義補卷一百

欽定四庫全書薈要卷二千七百十一

經部

大學衍義補卷一百一

明 邱濬 撰

治國平天下之要

慎刑憲

總論制刑之義

下

呂刑伯夷降典折民惟刑

蔡沈曰典禮也伯夷降天地人之三禮以折民之邪

妄

蘓軾曰失禮則入刑禮刑一物也

吳澄曰自上教下曰降伯夷教民以禮民入於禮而不入於刑折絕斯民入刑之路也

臣按虞廷九官伯夷作秩宗典禮臯陶作士師掌刑而此則云伯夷折民惟刑蔡沈謂捨臯陶而言伯夷探本之論也蓋禮與刑二者出此則入彼立典於此而示民以禮節之所當然而又象刑於彼

而示民以法禁之所必然所當然者祀典之常制
所必然者有司之成法降下其典於民使其知必
如此則為合於禮不如此則為犯於刑啟其善端
遏其邪念折而轉之使不入於刑而入於禮焉所
以然者蓋以禍亂之興多起於民之干犯禮典民
神雜揉妖言肆興則人心不正而禍亂作矣伯夷
作秩宗降下祀天神享人鬼祭地祇之三典播告
之修著為格令使夫蚩蚩蠢蠢之民皆知人各有

所當祭之鬼神非此族也不在祀典祭非祭者有
禁犯禁者輕則有罰重則有誅是以各安其分而
不敢瀆齊盟行僭禮舉淫祀習妖術由是常道明
而人心正所以不犯于有司是則伯夷所降之典
其禮儀等級雖非一端而折絕斯民之邪心妄念
惟在于刑焉耳所謂折民惟刑意或在此歟又按
班固漢書刑法志引此言折作愆下文即繼之以
言制禮以止刑解者謂愆知也言伯夷降下禮法

以道人人習知禮然後用其刑也其言亦有理
士制百姓于刑之中以教祇德

蔡沈曰舜命皋陶為士制百姓于刑辟之中所以檢
其心而教以祇德也

吳棫曰皋陶不與三后之列遂使後世以刑官為輕
後漢楊賜拜廷尉自以代非法家言曰三后成功惟
殷于民皋陶不與蓋吝之也是後世非獨人臣以刑
官為輕人君亦以為輕矣觀舜之稱皋陶曰刑期于

無刑民協于中時乃功又曰俾予從欲以治四方風動惟乃之休其所繫乃如此是可輕哉

臣按呂刑雖周穆王所作然必有所傳授非虛言也夫伯夷禮官也所降者典而折民惟刑臯陶刑官也所制者刑而教民祗德可見有虞為治專以禮教為主而刑辟特以輔其所不及焉耳禮典之降而折以刑所以遏其邪妄之念而止刑辟於未然刑罰之制而教以德所以啟其祗敬之心而制

刑辟於已然禮教刑辟之相為用如此帝世之制
所以本末兼舉而民協于中自不犯於有司也歟
穆穆在上明明在下灼于四方罔不惟德之勤故乃明
于刑之中率又于民棐彞

蔡沈曰穆穆者和敬之容也明明者精白之容也灼
于四方者穆穆明明輝光發越而四達也君臣之德
昭明如是故民皆觀感動盪為善而不能自己也如
是而猶有未化者故士師明于刑之中使無過不及

之差率义于民輔其常性所謂刑罰之精華也

呂祖謙曰當時承蚩尤之弊妖誕怪神深溺人心重
黎絕地天通固區別其大分矣然蠱惑之久未易遽
勝伯夷復降天地人之祀典使知天地之性鬼神之
德森然各有明法向之蠱惑消蕩不留所謂折民于
刑也自不知本者觀之平水播穀若所急而降典可
緩抑不知人心不正胥為禽夷雖有土安得而居有
粟安得而食伯夷降典先其本也自伯夷之典迄皐

陶之刑制度文為之具也自穆穆在上至率乂于民
棐彞精神心術之運也苟無其本則前數者不過卜
祝工役農圃胥史之事耳

臣按虞廷君臣其德存於中其容著於外天下之
人瞻而望之見其明白顯著在上者灼然而明在
下者曉然而喻無有回護掩蔽之私幽深隱僻之
事是以當世之民耳聞而心孚目擊而意契固無
有不化者而無待於刑罰之加然聖人之心則自

以為吾之君臣固勤矣然吾民之生生無窮安能
皆保如今日乎故命士師明於刑之中制為一定
之制以曉天下之人如是則為太過如是則為不
及必如是而後為無過不及而中矣所以然者率
乂于民輔其常性使其常循乎矩度之中而不出
乎防範之外而天然自有之中本然不易之性常
全而不失矣

天齊于民俾我一日非終惟終在人爾尚敬逆天命以

奉我一人雖畏勿畏雖休勿休惟敬五刑以成三德一人有慶兆民賴之其寧惟永

蔡沈曰刑獄非所恃以為治也天以是整齊亂民使我為一日之用而已非終即康誥大罪非終之謂言過之當宥者惟終即康誥小罪惟終之謂言故之當辟者非終惟終皆非我得輕重惟在夫人所犯耳爾當敬逆天命以承我一人畏威古通用威辟之也休宥之也我雖以為辟爾惟勿辟我雖以為宥爾惟勿

宥惟敬乎五刑之用以成剛柔正直之德則君慶於上民賴於下而安寧之福其永久而不替矣

臣按刑天討也天以是而齊亂民不得已而為一日之用爾非常用以為治之具也人君奉天道以出治所以為治者德也刑非所先也民有不齊者不得已而用刑以治之姑以為一日齊民之用也所以為治者不顯顯在是也典獄之官必當敬逆天之命以奉承乎君過之當宥者則承天之命以

宥之不當宥者君雖宥之不宥也過之當辟者則
奉天之命以辟之不當辟者君雖辟之不辟也所
以然者守君之法所以奉君也順天之理所以敬
天也奉君之法而不奉君之意則是能敬迎天命
矣所以敬迎天命者敬五刑以成三德而已矣敬
五刑以為一日之用成三德以立萬世之則刑用
而即已德立而無窮所以為國家之慶者容有既
乎兆民以之而永賴國祚由是而延長三代有道

之長用此道也秦人恃刑罰以為一世之用卒之
流毒海內二世即亡豈非永鑒哉

王曰吁來有邦有土告爾祥刑在今爾安百姓何擇非
人何敬非刑何度非及

蔡沈曰有民社者皆在所告也夫刑凶器也而謂之
祥者刑期無刑民協于中其祥莫大焉及逮也漢世
詔獄所逮有至數萬人者審度其所當逮者而後可
逮之也曰何曰非問答以發其意以明三者之決不

可不盡心也

吳澂曰刑而曰祥刑蓋慈良惻怛詳審謹重主之以不忍行之以不得已所以謂之祥也在今日欲安百姓何者當擇非人乎何者當敬非刑乎何者當揆度非及乎人謂用刑之人及謂刑之所加猶罰及爾身之及

臣按忝錯訊鞠極天下之至勞者莫若獄割斷箠擊極天下之至慘者莫若刑是乃不祥之器也而

古人謂之祥刑者蓋除去不善以安夫善使天下之不善者有所畏而全其命天下之善者有所恃而安其身其為器也固若不祥而其意則至善大祥之所在也苟用人而不擇用刑而不敬逮人而妄及非辜其為不祥之器也宜哉蘇軾謂罪非已造為人所累曰及秦漢間謂之逮獄吏以不遺支黨為忠以多逮廣繫為利漢大獄有逮萬人者國之安危運祚長短咸寄於此噫漢獄之逮最多者

皆在末造之世使當高文光武明章之世得張釋
之于定國輩為廷尉無此也穆王設為三問而三
答之其要尤在於擇人得其人必能敬刑能敬刑
則不妄逮矣

輕重諸罰有權刑罰世輕世重惟齊非齊有倫有要
蔡沈曰罰之輕重亦皆有權權者進退推移以求其
輕重之宜也刑罰世輕世重者周官刑新國用輕典
刑亂國用重典刑平國用中典隨世而為輕重者也

輕重諸法有權者權一人之輕重也刑罰世輕世重者權一世之輕重也惟齊非齊者法之權也有倫有要者法之經也言刑罰雖惟權變是適而齊之以不齊焉至其倫要所在蓋有截然而不可紊者矣

臣按先儒謂情之輕重世之治亂不同則刑罰之用當異而欲為一法以齊之則其齊也不齊以不齊齊之則齊矣惟齊非齊以不齊齊之之謂也先後有序謂之倫衆體所會謂之要所謂法之經也

經一定而不可紊權則因時而制宜穆王年雖耄
荒而其訓刑也猶守文武之法惓惓然猶有唐虞
之遺意此夫子所以取之也

王曰嗚呼嗣孫

嗣世子孫

今往何監

視也

非德于民之中尚明

聽之哉哲人惟刑無疆之辭屬于五極咸中有慶受王

嘉

善師也衆也

監于茲祥刑

蔡沈曰此詔來世也言今往何所監視非用刑成德
而能全民所受之中者乎下文哲人即所當監者五

極五刑也明哲之人用刑而有無窮之譽蓋由五刑
咸得其中所以有慶也諸侯受天子良民善衆當監
視于此祥刑

呂祖謙曰中者呂刑之綱領也苗民罔是中者也臯
陶明是中者也穆王之告司政典獄勉是中者也末
章訓迪自中之外亦無他說焉今爾何所當監豈非
德於民之中乎用刑者有意于譽欲以德名而不足
以為德所以為德者必於民之中而後可也

夏僎曰民受天地之中以生未嘗不善其陷於罪惡
非其本然也故民曰嘉師刑雖主於刑人然刑姦宄
所以扶善良雖曰不祥乃所以為祥也故刑曰祥刑
嘗為之說曰民之犯刑無非惡也而謂之嘉師刑本
不祥之器也而謂之祥刑能以惡為嘉以不祥為祥
而後知用刑之道矣

臣按帝王之道莫大於中中也者在心則不偏不
倚在事則無過不及帝王傳授心法以此為傳道

之要以此為出治之則書始於虞書允執厥中大
舜以之而傳道書終於周書咸中有慶穆王以之
而訓刑聖人之心不偏不倚而施之事為者無過
不及非獨德禮樂政為然而施於刑者亦然蓋民
不幸犯于有司所以罪之者皆彼所自取也吾固
無容心於其間不偏於此亦不倚於彼一惟其情
實焉既得其情則權其罪之輕重而施以其刑其
刑上下不惟無太過且無不及焉夫是之謂中夫

是之謂祥刑

周禮乃立秋官司寇使帥其屬而掌邦禁以佐王刑邦國

鄭氏曰秋官司寇者象秋所立之官寇害也先王之治先之以德禮而輔之以刑政故司寇掌刑而屬於秋官秋者天氣肅殺而刑以義為主也刑官司至於寇則刑官之事無不舉矣

臣按小宰言秋官其屬六十掌邦刑而此言掌邦

禁蓋禁者戒之於未然刑者治之於已然先王之心惟恐民愚而誤入於刑罰故豫為明示法禁使知有如是之罪必陷如是之刑有如是之惡必麗如是之辟明威立義俾知不迷防微遏萌逆折其始必不得已而後刑之禁之所以為仁刑之所以為義禁之不已猶有犯焉於是乎以義斷仁焉此其所以立民極也歟

大司寇之職掌建邦之三典以佐王刑邦國詰四方一

曰刑新國用輕典二曰刑平國用中典三曰刑亂國用重典

林之竒曰司寇刑新國用輕典者以其舊染汙習不可遽正姑以教之宜以柔克之義也刑平國用中典者以其已安已治既富既庶陶冶被服莫不平治則教化已明習俗已成宜以正直之義也刑亂國用重典者以其頑昏暴悖不可訓化則殲渠魁滅彊梗宜以剛克之義也書曰惟敬五刑以成三德其此之謂

乎

臣按典者常也民失其常則為權時之制本三德以趣時分三典以興治使之復其常焉聖人於此何容心哉伏惟我聖祖當大業初定之時作為條訓以示子孫有曰朕自起兵至今四十餘年人情善惡真偽無不歷涉其中姦頑刁詐之徒情犯深重灼然無疑者特令法外加刑使人知所警懼然此特權時處置頓挫姦頑非守成之君

所常用以後子孫止守律與大誥並不許用黥刺
剕劓閹割之刑敢有請用此刑者將犯人凌遲全
家處死由是觀之聖祖之用重刑蓋非得已也文

子文孫當承平之時守祖宗之訓一用平典以安

兆民敷仁恩於四海延國祚於萬年臣不勝至願

以五刑糾

察也

萬民一曰野刑上功

農功也

糾力

勤力也

二曰

軍刑上命

謂將命

糾守

謂不失部伍

三曰鄉刑上德

謂六德

糾孝

謂善事父母

四曰官刑上能

謂能其事

糾職

謂脩其職

五曰國刑上愿

慤慎糾暴

暴當作恭不恭者當糾也

劉彝曰刑者不得已而用之豈聖人所樂哉故力不
懋則財不生而野荒民散矣是野刑不可已也亂不
除則民不安而民散國離矣是軍刑不可已也孝不
盡則忠不純而家破國微矣是鄉刑不可已也職不
舉則治不成而政衰俗薄矣是官刑不可已也禮不
行則中不建而君弱臣強矣是國刑不可已也天地
四時者六官之序聖人體其序而化成天下之道也

野軍鄉官國者五刑之序聖人不得已而即其序以措萬民於中和之道也

臣按先儒謂以五刑糾萬民者建六典以為民極也是故六卿各職於其官而建之使必行於天下行之使必範於後世者大司寇正其刑典也是故野刑不立則事功不成功之所以成者役民以作事咸赴力以致其力也野刑之用專以糾不致力之人則凡國家之溝涂隄防城邑樹藝野無不辟

而功無不成矣則是冬官所建之事典待刑而立也軍刑不立則軍令不行令之所以行者設民以立政咸用命以死守也軍刑之用專以糾不死守之人凡國家師旅芟舍校閱征戍軍無不振而命無不用矣則是夏官所建之政典待刑而立也孝不盡則德不純設為鄉刑以糾不孝之人則民皆上德而無不孝之子凡司徒八刑所糾者孝友睦婣任恤之行備矣是教典資於刑也職不舉則能

不見設為官刑以糾不職之人則吏皆上能而無不治之職凡冢宰百官所建者官聯府史胥徒之職舉矣是治典有資於刑也禮典之建所以和邦國也國必有禮禮之所行以原慤為上而不恭則不足以為禮矣設為國刑專糾夫不恭之人使之皆原慤為上焉是禮典有資於刑也由是觀之則刑之為刑雖屬於秋官而五官不得不治焉蓋治也教也政也禮也事也聖人治天下之具也然所

以致其功之立而化之成舍刑以糾之安能保其終不怠而久不廢哉

大戴禮刑罰者御人之銜勒也吏者轡也刑者策也天子御者內史太史左史手也古者以法為銜勒以刑為策以人為手而御天下公家不畜刑人大夫不養士遇之途不與之言屏諸四方唯其所之不及以政不欲生之故也

臣按古者待刑人其嚴如此非故絕之也欲人知

所懲而不敢為惡也絕其所已然以懲其所未然
所絕者少而所全者衆聖人大公至仁之心也

禮記凡制

斷也

五刑必即天倫

天理也

郵

與尤同責也

罰麗於事

陳澧曰天之理至公而無私斷獄者體而用之亦至
公而無私凡有罪責而當誅罰者必使罰與事相附
麗則至公無私而刑當其罪矣

凡聽五刑之訟必原父子之親立君臣之義以權之意
論輕重之序慎測淺深之量以別之悉其聰明致其忠

愛以盡之

方慤曰父子之親本乎情故曰原君臣之義錯諸事
故曰立親主於愛一於愛則刑有所不忍加義主於
敬一於敬則刑有所不敢及一皆如是豈足以爲法
之經哉其或於親有所原於義有所立者特從法之
權而已故曰以權之也

陳澔曰父子君臣人倫之重者故特舉以言之亦承
上文天倫之意所犯雖同而有輕重淺深之殊者不

可緊議也故別之所謂權也明視聰聽而察之於詞色之間忠愛惻怛而體之於言意之表庶可以盡得其情也

陳櫟曰後世之民犯刑多上失其道之所致未必皆其民之罪刑獄固在得其情而不可喜得其情欲得其情固在於悉其聰明哀矜勿喜尤在於致其忠愛歟

臣按刑法之制所以弼教而教之本在乎天倫而

天倫之重者父子君臣也父子主仁君臣主義一切輕重之罪淺深之情皆主於父子之仁君臣之義必原其本然之心必立其當然之義意而論之慎以測之序有先後而必循其次量有大小而不過其劑所以分而別之者用以合其權度也既別之而又盡之盡之則理無遺矣不徒盡之而又成之成之則獄斯備矣君子之盡心於刑如此天下豈有冤民哉彞倫又豈有或斃哉

凡作刑罰輕無赦刑者例也例者成也一成而不可變故君子盡心焉

鄭氏曰例是刑體

馬晞孟曰此言立法制刑之意雖輕無赦所以使人難犯也惟其當刑必刑輕且不赦而況於重者乎故君子不容不盡心焉蓋刑之所以為刑者猶人之有例也一辭不具不足以為刑一體不備不足以為成人辭之所成則刑有所加而不可變故君子盡心焉

君子無所不盡其心至於用刑則尤慎焉者也

臣按先儒謂無赦則民不至於犯罪盡心則吏不
至於濫刑有無赦之法以禁於未然之前有盡心
之吏以應於已然之後此民所以畏法而親上也
子曰五刑之屬三千而罪莫大於不孝要君者無上非
聖人者無法非孝者無親此大亂之道也

臣按刑以弼教教之大者倫理也人君者生民之
主聖人者道德之主父母者生身之主親為一家

之主孝其親則人道以立君為一世之主忠其君則治道以成聖人為萬世之主尊聖人則世教以明先王制為刑法以弼世教世教之大在此三者人人孝其親忠其君尊夫聖人則天下大治矣否則大亂之道焉然是三者其根本起於一家家積而國國積而世故尤嚴於不孝之罪以為天下事無有不起於近而後及於遠始於微而後至於著也故律文著不孝之罪而所謂要君非聖人者則

略焉非略之也不可言也著其可言者以示微意
萬一有是獄焉準此以權度之也

子曰禮樂不興則刑罰不中刑罰不中則民無所措手
足

范祖禹曰事得其序謂之禮物得其和謂之樂事不
成則無序而不和故禮樂不興禮樂不興則施之政
事皆失其道故刑罰不中

金履祥曰事有條理則有禮樂事得其序則為禮事

得其和則為樂事既不成則何以能有禮樂無禮則
無序而施之也乖繆無樂則無和而行之也忿戾乖
繆忿戾則刑罰安能中理刑罰不中理則民難於避
就

臣按禮樂刑政其致一也必有禮樂以為刑政之
本則政事之行刑罰之施皆本乎自然之理以立
為當然之制使民知所避而不敢違是以民生日
用之間心志有所主耳目有所加舉動云為有所

制是以不犯於有司有犯焉者然後施之以刑罰
苟為不然蚩蚩蠢蠢之民一舉手一動足皆罹於
憲網之中而不知所以為生者矣民不知所以為
生則求所以為生之路求之不得則捨死以求禍
亂之作往往以此秦隋之亡其明驗也

孟子曰以生道殺民雖死而不怨殺者

程頤曰以生道殺民謂本欲生之也除害去惡之類
是也蓋不得已而為其所當為則雖拂民之欲而民

不怨其不然者反是

朱熹曰彼有惡罪當死吾求所以生之者而不得然後殺之以安其衆而厲其餘此以生道殺之也亦何怨之有

張栻曰以生道殺民雖死不怨殺者先王明刑法以示民本欲使之知所趨避是乃生之之道也而民有不幸而陷於法則不得已而加辟焉固將以遏止其流也是亦生道而已又况哀矜忠厚之意薰然存乎

其間其為生意未嘗有間斷也若後世嚴刑重法固不足道而其得情而喜與夫有果於疾惡之意一毫之萌亦為失所謂生道者矣

臣按天地之大德曰生人得天地之德以為生莫不好生聖人體天地之德以為生人之主故其德亦惟在於好生也惟其好人之生故其存心治政莫不以生人為本人見其德教之施恩澤之布以為生人也而不知刑罰罰之加兵戈之舉亦皆所

以為生人焉耳蓋死之所以生之也苟非其人實
有害於生人決不忍致之於死地死一人所以生
千萬人也是故無益於生人必不輕致人於死

荀子曰世俗之為說以為治古者無肉刑有象刑墨黥
之屬菲屨赭衣而不純

菲草屨也純緣也衣不加緣以恥之也

是不然矣

以為治古則人莫觸罪耶豈獨無肉刑哉亦不待象刑
矣為人或觸罪戾而直輕其刑是殺人者不死而傷人
者不刑也罪至重而刑至輕民無所畏亂莫大焉凡制

刑之本將以禁暴惡惡且懲其末也殺人者不及傷人者不刑是惠暴而寬惡也故象刑非生於治古並起於亂今也夫征暴誅悖治之威也殺人者死傷人者刑百王之所同也未有知其所由來者也故治其刑重亂則刑輕犯治之罪固重犯亂之罪固輕也書曰刑罰世輕世重此之謂也

洪邁曰虞書象刑惟明象者法也漢文帝詔始云虞之時畫衣冠異章服以為戮而民弗犯武帝詔云唐

虞畫象而民不犯白虎通云畫象者其衣服象五刑也犯墨者蒙巾犯劓者赭其衣犯髡者以墨其髡犯宮者扉扉草履也大辟者布衣無領

臣按虞書云象以典刑即繼以流宥五刑及鞭作官刑扑作教刑若如畫衣冠之說象以典刑為之象設可也若夫流與鞭扑若何而為之制耶意者當時有犯者其人在可議可矜之辟偶為此制耳不然古無此制而好事者見後世之刑慘刻矯其

枉而為此言歟

漢刑法志曰漢道至盛歷世二百餘載考自昭宣元成哀平六世之間斷獄殊死率歲千餘口而一人古人有言曰滿堂而飲酒有一人鄉隅而悲泣則一堂皆為之不樂王者之於天下譬猶一堂之上也故一人不得其平為之悽愴於心今郡國被刑而死者歲以萬數天下獄二千餘所其冤死者多少相覆獄不減一人此和氣所以未洽者也原獄刑所以蕃若此者禮教不立刑

法不明民多貧窮豪桀務私姦不輒得獄犴不平之所
致也書曰伯夷降典愆民惟刑言制禮以止刑猶隄之
防溢水也今隄防陵遲禮制未立死刑過制生刑易犯
饑寒並至窮斯濫濫豪桀擅私為之囊橐姦有所隱則
狃而寢廣此刑之所以蕃也孔子曰古之知法者能省
刑本也今之知法者不失有罪末矣又曰今之聽獄者
求所以殺之古之聽獄者求所以生之與其殺不辜寧
失有罪今之獄吏上下相驅以刻為明深者獲公名平

者多患害諺曰鬻棺者欲歲之疫非憎人欲殺之利在於人死也今治獄吏欲陷害人亦猶此矣

臣按班固此言非獨漢世治獄之失後世之獄類此亦多矣所謂伯夷降曲愆民惟刑言制禮以止刑猶隄之防溢水深得帝王為治禮刑先後之序其間句隅悲泣之喻鬻棺利死之譬皆痛切人情深中事理人主萬幾之暇以其言與前書所載路溫舒之疏並觀寧能不惕然於心乎其所謂今之

聽獄者求所以殺之古之聽獄者求所以生之請
合而言之曰聽獄者當於殺之中而求其生求其
生而不可得然後殺之有可生之路則請以議焉
罪疑從輕可也不疑然後殺之如是則獄無不得
之情世無冤死之鬼矣

光武建武十四年羣臣上言古者肉刑嚴重則人畏法
今今憲律輕薄故姦軌不勝宜增科禁以防其源詔下
公卿杜林奏曰古之明王深識遠慮動居其厚不防侈

辟周之五刑不過三千大漢初興詳覽失得破矩為圜
斲雕為樸蠲除苛政更立疏網海內歡欣人懷寬德及
至其後漸以滋章吹毛索疵詆欺無限果桃李茹之類
集以成賊小事無妨於義以為大戮故國無廉士家無
全行至於法不能禁令不能止上下相遁為敝彌深臣
愚以為宜如舊制帝從之

臣按卓茂有云律說大法禮順人情蓋人之所以
異於禽獸者以其有恩情之契禮俗之交也若一

切繩之以法凡歲時交饋皆以為賊尋常舉動皆坐以罪鳥獸不可與同羣而人之與人曷以相聚處而禮義何自而興哉杜林之議所謂集以為賊及小事無妨於義以為大戮非惟漢世後世亦有此弊乞定為明制饋送之賊不許集計其小事無妨於義者雖若於法不應然於大義無害者亦不以為罪如此則刑辟不多而動居於厚矣

以上總論制刑之義下



大學衍義補卷一百一

欽定四庫全書

覆校官編修臣張秉愚

校對官檢討臣王福清

謄錄監生臣浦煊

欽定四庫全書薈要

經部

大學衍義補卷一百二十四

至

詳校官編修臣程嘉謨



欽定四庫全書薈要卷二千七百十二

經部

大學衍義補卷一百二

明 邱濬 撰

國平天下之要

慎刑憲

定律令之制

上

舜典曰象以典刑

孔穎達曰易云象也者像此者也又曰天垂象聖人

則之是象為做法故為法也依法用其常刑用之使
不越法

朱熹曰畫象而示民以墨劓剕宮大辟五等肉刑之
常法也或問象以典刑如何為象曰此正言法象如
懸象魏之象

臣按呂刑曰蚩尤惟始作亂延及于平民罔不寇
賊惟作五虐之刑則肉刑在蚩尤之世已有之非
起自虞世也

夏作禹刑

湯制官刑儆于有位

蔡沈曰官刑官府之刑也

周禮正月之吉始和布刑于邦國都鄙乃縣刑象之灋

于象魏使萬民觀刑象挾日凡十而斂之

鄭氏曰象魏闕也魯災季桓子御公立于象魏之外

命藏象魏曰舊章不可忘

王昭禹曰刑雖先王原情以定罪因事以制刑亦當

因時而為之變通量時而有輕重正月之吉布刑于
邦國都鄙為是故也蓋先王之法若江河貴乎易避
而難犯若匿為物而愚不識其陷於罪又從而刑之
不幾於罔民乎其使民觀象者亦使知所避而已

臣按成周刑典之設既布于邦國都鄙又縣之象
魏惟恐民之不知而誤犯也夫設法令以待天下
固將使民易避而難犯顧乃深藏於理官法家自
典正職掌之官猶不能徧知其所有洞曉其所謂

况愚夫細民哉閭閻之下望朝廷之禁憲如九地
之於九天莫測其意嚮之所在及陷乎罪從而刑
之是罔民也宣聖王同民出治之意乎是以周禮
六官俱在正月之吉各布其典于象魏以示萬民
其所示者有善有惡使之知所好惡惟刑典則示
之以所禁使不犯焉

士師之職掌國之五禁之法以左右

助也

刑罰一曰宮

王宮

禁二曰官

官府

禁三曰國

城

禁四曰野

郊

禁五曰軍

軍旅

禁

皆以木鐸徇之于朝書而縣于門閭

卷門
曰閭

鄭氏曰古之禁書亡矣今宮門有符籍官府有無故擅入城門野有田律軍有囂譴夜行之制

賈公彥曰凡設五刑者刑期于無刑於刑外豫設禁禁民使其不犯於刑是左右助刑罰無使罪麗于民也

臣按三代未有律之名而所謂禁者即是豫為法禁以制之於未然雖無律之名而律之意已具於

此矣違乎禁則入於刑入於刑則犯於法犯於法則加以罰焉然非狗之以木鐸書之於門閭則蚩蚩蠢蠢之民何以知其為禁而不犯哉故以木鐸狗之於朝使之內有所聞以書而懸於門閭使之外有所見聞見於耳目之間警省於心思之內知所禁忌而不犯刑法所謂五禁之法左右乎刑罰宣不然哉

以五戒先後刑罰毋使罪麗于民一曰誓用之于軍旅

二曰誥用之于會同三曰禁用之田役四曰糾用諸國中五曰憲用諸都鄙

吳澂曰先後猶左右也以言折之曰誓若湯誓之類以言告之曰誥若康誥之類止使勿為曰禁察其有犯曰糾表而懸之曰憲以五戒左右其刑罰則無犯法之民矣

臣按以五戒先後刑罰即唐宋之律而有名例職制敕令格式之意也蓋禁止使勿為施於未然之

前戒救其怠忽施於事為之際先之則引而導之
使無進而麗於罰後之則扼而止之使無退而麗
於刑聖人之心見於母之一言其慈愛過於父母
其覆載同於天地

掌士之八成一曰邦汙二曰邦賊三曰邦謀四曰犯邦
令五曰橋邦六曰為邦盜七曰為邦朋八曰為邦誣
鄭衆曰八成者行事有八篇若今時決事比

吳澂曰汙讀如斟酌之酌謂刺探邦之機密而泄於

外者賊謂潛謀陰結將為逆亂者謀謂敵國行間覘伺虛實者令謂故恃傲狠以干號令者矯讀如矯作之矯謂詐為符璽以行號令者盜謂竊取國之寶藏者朋謂私黨相阿使亂政者誣為誣罔造妖以惑衆者

臣按先儒謂官府之八成則其經治之成法也士師之八成則其正亂之成法也先王之時齊八政以防淫一道德以同俗患夫姦人之為禍於邦家

也且八成之法使士師掌之使其知有犯於此者必刑之而無赦制治於未亂保邦於未危所以防其芽孽者豈不豫哉

司刑掌五刑之法以麗

附也

萬民之罪墨

墨刻額而涅之

罪五百

劓

割其鼻

罪五百宮

丈夫割勢女子幽閉

罪五百剕

截其足

罪五百殺

也死罪五百若司寇斷獄弊訟則以五刑之法詔刑罰而以辨罪之輕重

臣按五刑之名始見於虞書然未有其目也著其

目始於此司刑所掌者以五刑之法麗民之罪司
寇斷獄弊訟則詔之處其所應否或輕或重咸聽
其所附麗焉

司約掌邦國及萬民之約劑治神之約為上治民之約
次之治地之約次之治功之約次之治器之約次之治
摯之約次之

鄭氏曰此六約者諸侯以下至於民皆有焉劑謂券
書也

吳澂曰約言語之約束也治者理其相抵冒上下之
差也神約謂命祀郊社羣望及祖宗也民約謂征稅
遷移及仇讎既和之類也功約謂王功國功之屬爵
賞所及也器約謂禮樂吉凶車服所得用也摯約謂
玉帛禽鳥相與往來也

臣按有約以結其信有劑以固其約謂之約劑則
約而有其劑也司約掌邦國及萬民之約劑凡有
六焉是六者朝廷皆為之約劑付司約掌之而屬

於秋官焉先為之約劑使人知所守而有如其約者則考其券書以治之亦猶後世之格式也

禁殺戮

官名

掌司斬殺戮者凡傷人見血而不以告者攘

獄者過訟者以告而誅之

鄭氏曰掌殺戮者禁民不得相殺戮司猶察此四者告於司寇罪之也斬殺戮謂吏民相斬相殺相戮者傷人見血見血乃為傷人耳

吳澂曰攘獄謂罪人之劫獄者過訟止遏民訟也

臣按人君為生民之主必使之相安養以全其生
彼其相斬相殺相戮及傷人見血而不以告則必
殺傷人者之強衆而被殺傷者之寡弱也與夫獄
已具而攘奪之訟將興而遏止之則民之情將鬱
而不伸下之惡將長而益熾國之法將格而不行
苟不設官以掌之使有如是者則以告之於其長
則民寡弱者含冤而莫訴強衆者稔惡而不悛氣
久鬱則無聊力不敵則捨死而亂由是生矣

禁暴氏掌禁庶民之亂暴力正者矯誣犯禁者作言語而不信者以告而誅之

鄭氏曰民之好為侵陵稱詐謾誕此三者亦刑所禁也力正者以力强得正也

吳澂曰禁止也亂謂悖於人倫暴謂敢作威怒力正謂脅衆從己以邪為正也矯誣謂矯曲為直誣善為惡以冒犯禁也

臣按成周之世未有律令之書凡秋官司寇所設

之官屬所掌之刑禁凡所當禁約施行者即後世法律之條件也說者謂秋官自禁殺戮至脩閭氏八官皆幾防盜賊姦軌者較之今律斬殺戮即今之人命律攘獄即今之劫囚律遏訟即今之告狀不受律姑舉一二餘可以類推矣茲不備載云

呂刑曰墨罰之屬千劓罰之屬千剕

刑足也

罰之屬五百

宮刑之屬三百大辟

死刑

之罰其屬二百五刑之屬三千

上下比罪無僭亂辭勿用不行惟察惟法其審克之

蔡沈曰三千總計之也周禮司刑所掌五刑之屬二千五百刑雖增舊然輕罪比舊為多而重罪比舊為減也比附也罪無正律則以上下刑而比附其罪也亂辭辭之不可聽者不行舊有是法而今不行者戒其無差誤於僭亂之辭弗用今所不行之法惟詳明法意而審克之也

呂祖謙曰墨劓所增皆輕刑官所損二百大辟所損三百皆重刑也剕無增損居輕重之間者也輕罪則

多於前重罪則損於舊觀其目則哀矜之意固可見
觀其凡則文勝俗弊亦可推矣

陳大猷曰三千者法之正條載之刑書者也刑如律
比如例法有限情無窮三千之屬衆矣猶不能盡天
下之情罪以此知人情無窮而法不可獨任也既無
正律復僭亂而無定辭將安所據依乎且又有此例
昔嘗有之而今不可行者矣必無差亂其辭而妄比
附勿用今不可行之法而強比附如漢長安賈人與

渾邪王市者罪當死凡五百餘人

汲黯曰愚民安所知市賈長安中而文吏以為闡出財物如邊關乎此類乃以不可行者比附也

臣按先儒謂三千已定之法載之刑書者也天下之情無窮刑書所載有限不可以有限之法而盡無窮之情又在用法者斟酌損益之古者任人不任法法所載者任法法不載者參以人上下比罪是也以其罪而比附之上刑則見其重以其罪而

比附之下刑則見其輕故於輕重之間裁酌之然
必以辭為主辭若僭亂情與罪不相合是不可行
者也當勿用其不可行之法惟當察其情求之法
二者合而後允當乎人情法意是乃可行者也在
審克之而已是說雖以解經然而萬世之下律文
所不該載者比附之法莫切於此所謂察之情求
之法比之上刑不重比之下刑不輕而參酌於輕
重之間必允當乎人情法意可謂得審克之意矣

春秋左氏傳昭公六年鄭人鑄刑書

鑄刑書於鼎以爲國之常法

叔

何使詒

遺也

子產書曰昔先王議事以制不爲刑辟懼民

之有爭心也民知有辟則不忌於上並有爭心以徵於書而徵倖以成之弗可爲矣夏有亂政而作禹刑商有亂政而作湯刑周有亂政而作九刑三辟之興皆叔世也今吾子相鄭國制參辟鑄刑書將以靖民不亦難乎民知爭端矣將棄禮而徵於書錐刀之末將盡爭之亂獄滋豐賄賂並行終子之世鄭其敗乎盍聞之國將亡

必多制其此之謂乎

杜預曰權移於法故民不畏上因危文以生爭緣徼幸以成其巧偽

孔穎達曰刑不可知威不可測則民畏上也今制法以定之勒鼎以示之民知在上者不敢越法以罪已又不能曲法以施恩則權柄移於法矣且法之設文有限民之犯罪無窮自然有危疑之理以生其與上爭罪之心緣徼幸以成其巧偽將有實罪而獲免者

也夏商之末至有以私亂公以貨枉法其事不可復治乃遠取創業聖王當時所斷之獄因其故事制為定法至周之衰亦為刑書謂之九刑三辟謂禹刑湯刑九刑也辟罪也三者皆叔世所為不起於始盛之世為其文是制參辟勒於鼎是鑄刑書也子產亦采取上世之法斷獄善者制為法也今鑄鼎示民民知爭罪之本在於刑書將棄禮而取徵驗於書則雖刀錐微細之事亦將盡爭辨以求徼幸如此則紛亂之

獄訟愈益豐盛或以賄賂文致人罪或以賄賂幸脫刑辟鄭國必有禍敗也

昭公二十九年晉鑄刑鼎著范宣子所為刑書焉仲尼曰晉其亡乎失其度矣夫晉國將守唐叔之所受法度以經緯其民卿大夫以序守之民是以能尊其貴貴是以能守其業貴賤不愆所謂度也今棄是度也而為刑鼎民在鼎矣

孔穎達曰范宣子制作刑書施於晉國自使朝廷承

用未嘗宣示下民今荀寅謂宣子之書可為國法故鑄鼎而銘之以示百姓猶如鄭鑄刑鼎仲尼譏之其意與叔向譏子產同

又曰子產鑄刑書而叔向責之趙鞅鑄刑鼎而仲尼譏之如此則刑之輕重不可使民知也而李悝作法蕭何造律頒於天下懸示兆民秦漢以來莫之能革不可一日無也蓋古者分地建國作邑命家諸侯則奕世相承大夫亦子孫不絕皆知國為吾土衆實我

民自有愛吝之心不生殘賊之意故得設法以待刑
臨事而議罪不須預以告民故仲尼叔向所以譏其
鑄刑書也秦漢以來天下為一長吏以時遷代其民
非復已有懦弱則為殿負強猛則為稱職且疆域闊
遠戶口滋多大郡境餘千里上縣數以萬計豪橫者
陵蹈邦邑桀健者雄張閭里酷吏專任刑誅或乃肆
情好殺違衆用已至有積骸滿竇流血丹野若復信
其殺伐任其縱舍必將喜怒變常愛憎改度不得不

作法以齊之宣衆以令之所犯當條則斷之以律疑不能決則讞之上府故得萬民以察天下以治聖人制法非不善也古不可施於今今人所作非能聖也足以周於用所謂觀民設教遭時制宜謂此道也

臣按鄭晉鑄刑書蓋以其前世所用以斷獄者之法比而鑄於器以示民於久遠也考周官司寇建三典正月之吉縣于象魏使萬民觀之挾日而歛夫國之常刑而又歲歲布之于邦國都鄙何哉刑

雖有常亦當量時而為之輕重然恐民之不知其所以然也故既布其制又懸其象所以曉天下之人使其知朝廷原情以定罪因事以制刑其故如是也皆知所畏避而不敢犯焉非謂刑之輕重不可使人知也先儒謂詳左氏所載夫子之說第令守晉國舊法以為范宣子所為非善耳非謂聖王制法不可使人知也或曰鄭晉二國所謂刑書皆先世所有臨時處置者固已載於方策至是子產

范鞅始鑄於器則為一定之制無復古人酌量之制故仲尼叔向譏之非謂刑書不可有特謂不可鑄耳後世以律令鐫於木以頒行天下其亦鑄之之意歟但是時未有律之名而謂之書耳

魏文侯時李悝著法經六篇一盜法二賊法三囚法四捕法五雜法六具法

臣按刑法之著為書始于此成周之時雖有禁法著于周官然皆官守之事分繫於其所職掌未有

成書也然五刑之目其屬各有多少五等之刑各以類而相從焉著之篇章分其事類以為詮次則於此乎始焉

漢高祖初入咸陽與民約法三章殺人者死傷人及盜抵罪餘悉除去秦苛法後以三章之法不足以禦姦遂令蕭何擴撫秦法定律令除參夷連坐之法增部主見知之條於李悝所造六篇益事律擅興廐庫三篇合為九篇叔孫通益律所不及傍章十八篇

臣按律之名始見於此春秋之時子產所鑄者謂之刑書戰國之世李悝所著者謂之法經未以律為名也禮記雖有加地進律之文折言破律之誅解者謂進律為爵命之等破律雖以去律言然王制漢文帝時博士刺經所作固已出蕭何之後也律之言昉於虞書蓋度量衡受法於律積黍以盈無錙銖爽凡度之長短衡之輕重量之多寡莫不於此取正律以著法所以裁制羣情斷定諸罪亦

猶六律正度量衡也故制刑之書以律名焉

文帝元年詔曰法者治之正所以禁暴而衛善人也今犯法者已論而使無罪之父母妻子同產坐之及為收帑_{子也}朕甚弗取其議除收帑諸相坐律令

臣按虞廷罰不及嗣周室罪人不孥秦法一人有罪並坐其室家仁暴之心既殊國祚所以有長短之異也文帝即位之初即除去秦人之苛刑漢祚之延幾於三代未必不基於斯

十三年下令曰蓋聞有虞氏之時畫衣冠異章服以為
戮而民弗犯何治之至也今法有肉刑三而姦不止其
咎安在非乃朕德薄而教不明歟吾甚自愧故夫訓道
不純而愚民陷焉詩曰愷悌君子民之父母今人有過
教未施而刑已加焉或欲改行為善而道亡無繇至朕
甚憐之夫刑至斷支體刻肌膚終身不息生也何其刑之
痛而不德也豈為民父母之意其除肉刑有以易之及
令罪人各以輕重不亡逃有年而免其不亡逃者滿其
年數免為庶人

具為令

馬端臨曰古者五刑皆肉刑也孝文詔謂今有肉刑
三而姦不止註謂黥劓斬趾三者遂以髡鉗代黥劓
三百代劓笞五百代斬趾獨不及宮刑至景帝元年
詔言孝文皇帝除宮刑出美人重絕人之世也則知
文帝并宮刑除之至景帝中元年赦徒作陽陵者死
罪欲腐者許之而武帝時李延年司馬遷張安世況
賀皆坐腐刑則是因景帝中元年之後宮刑復用而

以施之死罪之情輕者不常用也

臣按後世以笞箠為刑始此夫三代以前所謂肉刑者墨劓剕宮大辟也至漢初僅有三焉黥劓斬趾而已文帝感淳于公少女緹縈之言始下詔除之遂以髡鉗代黥笞三百代劓笞五百代斬趾自是以來天下之人犯法者始免斷支體刻肌膚百世之下人得以全其身不絕其類者文帝之德大矣

以上論定律令之制_上

大學衍義補卷一百二